

Promer Ministro un tempo a elimina Raadsadviseur Bareño ta cuestiona nombramento Kuiperi como consultant

ORANJESTAD(AAN)--

Den un serie di pregunta, Grace Bareño, miembro di Parlamento pa MEP, ta trece dilanti cu Bestuurscollege di MEP na 1985 a tuma e decision pa nombra algun persona cu a sirbi comunidad pa hopi aña como raadsadviseur den schaal 15, cu ta equivalente na fls.5.740,-- pa luna.

Esnan cu a worde nombra tabata entre otro betico Croes, ex-diputado pa MEP Michael Kuiperi, Ex Gezaghebber Pedro Bislip, ex ambtenaar Percy Dentz, ex Diputado Nelson Oduber, ambtenaar Coby Alders.

Dia 31 di December e Gobierno di Henny Eman a anula e decisionnan tuma pa Bestuurscollege di MEP y tambe e decision pa nombra raadsadviseurs.

E decision, cu Bareño ta yama descabeya, tabata tin como consecuencia cu Gobierno mester a scupi un dineral pa paga tur gasto di abogado cu mester a defende Gobierno contra e ambtenaarnan cu a hiba nan caso dilanti. Den mayoria di caso e ambtenaarnan a gana, segun Bareño.

Awor e miembro di parlamento tin entendi cu no ta papia mas di Raadsadviseurs, pero di consultant. Relaciona cu esaki, manera Bareño ta trece dilanti, Gobierno a nombra Michael Kuiperi como consultant cu un salario barbaro di fls.7.060,-- pa luna.

E ta puntra si Promer Mini-

stro por a informa Parlamento kico a conduci na anulacion di e decision pa Raadsadviseur y cual ta e criterionan cu Gobierno a usa pa introduci consultant.

Tambe e kier haya informacion entorno e criterionan pa a nombra Michael Kuiperi

como consultant pa e salario cu e ta ricibi y cual ta su tarea.

Bareño kier tende tambe cuanto persona mas a worde nombra como consultant.

E kier sa kico nan salario y tarea ta y pa cuanto tempo nan contrato ta core.